



Die Aabrennte Fasnacht 2018

Dr Eeredogger Federer isch sit sym Titel anderscht druff,
Är wärdi Sportarzt und miech z Wollerau e Gmeinschaftspraxis uff.
Und als Hilf bim Operiere, falls es ammen e bitz harzt,
Empfäale mir dr Constantin no als Narkosenarzt.

Wie funktioniert Verfiere hüt? Mir sin do zimmlig irritiert,
E Glesli Roote und e Liebesfilm – het friener funktioniert.
Doch das Drääibuech kasch vergässe, s Happy End gits nümmi gschänggt,
Well jedi Frau bim Wyyglas numme no an Weinstein dänggt.

Är sitzt in dr Air Force One grad unterwägs Richtig Davos,
Me het iim Gummibäärli gää und s goot iim dorum ganz famos.
Doch kurz vor Züri-Klote gneisst er uuse und riefst plötzlich: "Shit!
Mir mien sofort wände – in dämm Dräcksloch land i nit!"

Freue Sii sich druff, wenn ändlig s autonomen Auto kunnt?
Mir göön denn ammen ein go nää und s faart uns heim zue spooter Stund.
Au dr Buttet freut sich druff und heig uf so nen Auto gspaat,
Wo iin denn au mit zwei Promille zur eigne Huustüür faart.

«Klopf, klopf!» Wäär stoot an dr Tüüre, ungfrogt und zmittst in dr Nacht?
S isch nit dr Yannick Buttet, wo spontan Promille-Bsiechli macht.
Au nit dr Sänsemaa, wo kunnt, das wär no s kleinere Malöör,
Es isch dr allerletschti Bsuech – vom Billag-Kontrollöör.

Nit nur d Schwoobe, au d Franzose gänn bim Spaare plötzlich Gas,
E Rabattaktion entfacht e Sturm dört ums Nutella Glas.
So vyyf Lärm um bruuni Sosse hänn mir wirgglig sälte gsee,
Das findsch in Dütschland also numme bi dr AFD.

Uf em Dorfplatz Sissach seesch e rosa Säuli ummestoo,
Voller Gwunder grunzts und frogt sich: "Worum sinn die Lütt ägschd doo?"
Denn wird iim klar um was es goot und fröölilig seits die letschte Wort:
"Statt ins Baselbiet kumm ich jetzt an e bessren Ort."

Au uns vier hets letsche Summer do dr Eermel ynegnoo,
Es het dreit und dreit und dreit – und isch halt doch nit vorwärts koo.
Doch scho im Herbscht isch es verbyy gsi und jetzt will si kein me haa,
Villicht klappts bim nägschde Moll denn – Ciao Italia!

Eerlich gseit uns wirts vor Yyfersucht sit neuschstem heiss und kalt,
Unsri Fraue sin jetzt nämmlig in dä Elon Musk verknallt,
Nitwäg sym Charme und wäg sym Ryychtum wänn die mit dämm Maa ins Bett,
Sondern nur, well dä jo schyyns die gröschd Rakete hett.

Rauchverbot bald an de Baanhöf, es wird zitteret und ghüült,
Statt me Schnällzug leere d Pändler, wie sich e Entzug aafüült.
Doch d SBB het reagiert und voller Stolz git me drum aa,
Dass me als Ersatz jetzt iire Service rauche kaa.

Mir bitte Sii jetzt bitz um Aadacht, s wird nümm glacht, sunscht sinn mir suur,
Mir mache das do nit zum Spass, nei dasch UNESCO Wältkultur.
Doch s längt uns nit mir hoffen uff e Titel von ere bsunderen Art,
Mir wänn nägschd Joor ändlig au no dr Fake News Award.

Dr Sven und Ingrid liige z Schweede im IKEA "Leksvik"-Bett,
Und dr Sven frogt d Ingrid zärtlig, ob si no bitz schrüüble wett.
Är hooli schnäll dr Sex-Verdraag, denn kunnt är zrugg und lacht lyycht quäält,
Es wird nüt druss, well leider in sim Drugger d Tinte fäält.

Mir wänn im Fäärnsee-Querschnitt koo, dasch s einzig, wo is interessiert,
Ganz radikal hänn mir is dorum gründlig sälber optimiert.
Körperlig hänn mir is fit gmacht, straff sin Hüfte, Buuch und Po,
Und für e glänzends Resultat, hänn mir is d Nase blyytsche loo.
Mir schwitze z viert bi Zumba, Crossfit, Bootcamp – wennis nur öppis nützt,
Und gege d Falte hänn mir absuggts Ranzefett in d Larve gsprützt.
Mir entgifte und entschlacke und entwurme, s isch e Qual,
Und gurgle dääglig mit Urin für d Stimm, ganz früsch vom Mittelstraal.
Fürs Mentale no ins Kloschter zum ne Yogi us Berlin,
Mir sin so achtsam und so ruhig jetzt, wien e Mönch uf Ritalin.
Alles klar, mir sin jetzt schön und nätt und smart und super-fit,
Numme schaad halt - dass es jetzt denn s Fäärnsee nümme git.

**Fir und vo liebe Frind ischs
Zündhölzli/Brandloch e wunderbaari
Fasnachtsbaiz mitten im Härz vo dr Frau
Fasnacht am Leonhardsstapfelbärg 2.
Göffnet isch dä sicheri Haafe däglich ab
den achte. Lueged also yyne uf dr aint
oder ander Spitze-Bangg!**

www.aabrennte.com